

SARS E HLOKOMETSE PALO E HODIMO HAHOLO, E BELAETSANG LE E SA TLWAELEHANG YA DINGODISO TSA VAT

Tshwane, 11 Motsheanong 2023 - SARS e ikemiseditse ho lefa balefalekgetho ba monyetleng wa sena dipusetso tse molaong ha sena se lokela ho etsahala. Ho bapa le boitlamo ba rona ba selemo sa ditjhelete sa 2022/23 ke dipusetso tse etsang rekoto tsa R381bn tse ileng tsa leshwa mme palong eo R319bn ebile dipusetso tsa VAT.

SARS e hlokometse hore ho na le tlwaelo e belaetsang ya dingodiso tsa barekisi ba VAT. Kgweding ya Mmesa, ka ho qolleha, re hlokometse ho nyoloha ho hoholo ho ileng ha hloka hore re lekole botjha motjha wa rona wa ngodiso. Motheo wa maikemisetso a rona a mawala a taolo ya rona ke ho etsa hore ngodiso e be bonolo. Sena se lokela ho etswa ho hlokometswe kotsi ya tshebediso e mpe le diteko tse etswang ke batho tsa ho fumana nomoro ya VAT hore ba tle ba tsebe ho tseka dipusetso tsa boqhekanyetsi. Re ile ra lemoswa sena ke mokgwatshebetso wa rona o shebaneng le tse ka bakang kotsi hore ho na le keketseho e belaetsang ya palo ya dingodiso, le hore tsena kaofela ha tsona di a belaetsa. Manollo ya rona e hlahisa hore palo e kgolo ya dingodiso tsena e etswa ka sepheo sa ho qhekanyetsa SARS mme ka ho etsa jwalo, le balefalekgetho ba tshepahalang.

Ka lebaka la ho hlokomela dingodiso tsena tsa VAT, le kgonahalo ya ho eketseha ha boqhekanyetsi, re qadile ka tsena tse latelang hanghang.

- Dingodiso tsohle tse ntjha tsa VAT di tla shejwa ka leihlo le ntjhotjho mme sena se ka akaretsa tlhokeho ya hore mokopi a iponahatse ka seqo lekaleng le haufi le moo kgwebo eo e tla ba teng hore ho tle ho nnetefatswe tsena.
- Moo ho hlokehang hore bakopi ba etele lekala, ketelo eo e lokela ho hlophiswa pele ho nako, ketelo ena e ka hlophiswa ka ho etela websaete ya SARS, ka ho tobetsa letshwao le reng “Book an Appointment”.
- Ditokomane tsohle tsa tshehetso tse hlokehang bakeng sa nnetefatso ena di tlameha ho nyehelwa lekaleng leo ka letsatsi la ketelo.
- Dingodiso tsa VAT di tla sebetsa feela ebang SARS e ikgotsofaditse hore kopo e jwalo e molaong.

SARS e malala-a-laotswe ho kenya diqoso tsa bonokwane kgahlano le ba etsang diketso tsena. Bao ba utswang ho tswa mokotleng wa naha ba imetsa rona ba lefang makgetho ka ho tshepahala, morwalo wa lekgetho.

Khomishenara ya SARS Mong. Edward Kieswetter o ntshitse temoso e matla ho bao ba nang le seabo dikemeng tsena. O itse: “SARS e ntse e ntlafatsa matsapa a yona a batho a ho sebedisa tsebo, mahlale a maiketsetso le boithuto ba dipalopalo ka metjhine ho tjhorisa bokgoni ba yona ba ho senola bao ba kgathatang tema diketso tsa bonokwane. Bao ba nyatsang boitlamo bona ba rona, ba tla kopana le pela di falla. Ho feta moo, ke lakatsa ho kopa tshwarelo ho balefalekgetho ba tshepahalang ka tiehiso e ka nnang ya bakwa ke sena”.

“SARS ke setheo sa bohlokwa kahong ya setjhaba le ho ntlafatsweng ha demokrasi ya rona ka ho phethahatsa boikarabelo ba yona ba ho bokella lekgetho, ho ntlafatsa boikobelo, le ho bebofatsa kgwebisano e molaong ho thusa ho aha mmuso o nang le bokgoni. SARS e tla phethahatsa thomo ena ntle le tshabo, leeme kapa tsela e inkelang diqeto.”

Ho fumana lesedi le fetang lena, ka kopo ikopanye le SARSmedia@sars.gov.za